

未底豫而禍患之弘多也臣等聞遇災不懼是為變之大者天心之不豫固可畏而人心之不懼尤可畏也伏望 殿下恐懼修省克盡誠敬開言路通上下亦修省之急務而近者臺諫近侍之言或有所不納而反加訑訑之色此果遇災求言從諫弗咈之美乎伏願 殿下留神焉答曰予以涼德叨承丕緒近年以來衆災不絕今又有兩種之異恐懼修省之意予豈少忽乎但以寡德未能上答天譴下慰蒼生以致天怒愈甚徒切反躬自責而已○夜艮方巽方如火氣

丙午 上御朝講○憲府啓曰災異疊現請行禁酒之令

史臣曰天視自我民視天聽自我民聽人怨於下則天怒於上猶影與響無足怪也臺官欲舉一細故事以為禦災之地所謂總小功之察其亦末也已

○日微暈

丁未 上御朝講領經筵事尹旼曰近日天災疊出未見悔禍昨見天雨沾足必自上憂勤格天之致也